

摘藻堂四庫全書薈要

史部

欽定四庫全書叢要

史部

通志卷一百九十二



詳校官員外郎臣楊世綸

欽定四庫全書薈要卷九千一百十

史部

通志卷一百九十二

宋 右迪功郎 鄭樵 漁仲 撰

載記第七

南涼

秃髮烏孤 利鹿孤 傉檀

南燕

慕容德 超 慕容鍾 封孚

北涼

沮渠蒙遜 牧犍

南涼

秃髮烏孤河西鮮卑人也其先與後魏同出八世祖匹  
孤率其部自塞北遷于河西其地東至麥田牽屯西至  
濕羅南至澆河北接大漠匹孤卒子壽闐立初壽闐之  
在孕母胡掖氏因寢而產於被中鮮卑謂被為秃髮因  
而氏焉壽闐卒孫樹機能立壯果多謀略泰始中殺秦

州刺史胡烈於萬斛堆敗涼州刺史蘇愉于金山盡有涼州之地武帝為之盱食後為馬隆所敗部下殺之以降從弟務丸立死孫推斤立死子思復鞬立部衆稍盛烏孤即思復鞬之子也及嗣位務農桑修鄰好呂光遣使署為假節冠軍大將軍河西鮮卑大都統廣武縣侯烏孤謂諸將曰呂氏遠來假授當可受不衆咸曰吾士衆不少何故屬人烏孤將從之其將石真若留曰今本根未固理宜隨時光德刑修明境內無虞若致死於我

者大小不敵後雖悔之無所及也不如受而遵養之以  
待其釁烏孤乃受之烏孤討乙弗折掘二部大破之遣  
其將石亦干築廉川堡以都之烏孤登廉川大山泣而  
不言石亦干進曰臣聞主憂臣辱主辱臣死大王所為  
不樂者將非吕光乎光年已衰老師徒屢敗今我以士  
馬之盛保據大川乃可以一擊百光何足懼也烏孤曰  
光之衰老亦吾所知但我祖宗以德懷遠殊俗憚威盧  
陵契汗萬里委順及吾承業諸部背叛邇既乖違遠何

以附所以泣耳其將苻渾曰大王何不振旅誓衆以討其罪烏孤從之大破諸部呂光封烏孤廣武郡公又討意云鮮卑大破之光又遣使署烏孤征南大將軍益州牧左賢王烏孤謂使者曰呂王昔以專征之威遂有此州不能以德柔遠惠安黎庶諸子貪淫三甥肆暴郡縣土崩下無生賴吾安可違天下之心受不義之爵帝王之起豈有常哉無道則滅有德則昌吾將順天人之望為天下之主留其鼓吹羽儀謝其使而遣之隆安元年

自稱大都督大將軍大單于西平王赦其境內年號太  
初曜兵廣武攻克金城光遣將軍竇苟來伐戰于街亭  
大敗之降光樂都湟河澆河三郡嶺南羌胡數萬落皆  
附之光將楊軌王乞基率戶數千來奔烏孤更稱武威  
王後三歲徙于樂都署弟利鹿孤為驃騎大將軍西平  
公鎮安夷傳檀為車騎大將軍廣武公鎮西平以楊軌  
為賓客金石生時連珍四夷之豪雋陰訓郭倖西州之  
德望楊統楊貞衛殷麴丞明郭黃郭奮史嵩鹿嵩文武



之秀傑梁昶韓正張昶郭韶中州之才令金樹薛翹趙振王忠趙晁蘇霸秦雍之世門皆內居顯位外宰郡縣官方授才咸得其所烏孤從容謂其羣下曰隴右區區數郡地耳因其兵亂分裂遂至十餘乾歸擅命河南段業阻兵張掖虐氏假息偷據姑臧吾藉父兄遺烈思廓清西夏無弱攻昧三者何先楊統進曰乾歸本我所部終必歸服殺業儒生才非經世權臣擅命制不由己千里伐人糧運懸絕且與我鄰好許以分災共患乘其危

樊非義舉也呂光衰老嗣紹冲闇二子纂弘雖頗有文武而內相猜忌若天威臨之必應鋒瓦解宜遣車騎鎮浩亶鎮北據廉川乘虛迭出多方以誤之救右則擊其左救左則擊其右使纂疲於奔命人不得安其農業無弱攻昧於是乎在不出二年可以坐定姑臧姑臧既拔二寇不待兵戈自然服矣烏孤然之遂陰有吞并之志段業為呂纂所侵遣利鹿孤救之纂懼燒氐池張掖穀麥而還以利鹿孤為涼州牧鎮西平追僞檀入錄府國

事是歲烏孤因酒墜馬傷脅笑曰幾死呂光父子大喜  
俄而患甚顧謂羣下曰方難未靜宜立長君言終而死  
在王位三年偽謚武王廟號烈祖弟利鹿孤立

利鹿孤以隆安三年即偽位赦其境內殊死已下又徙  
居于西平使記室監麴梁明聘于段業業曰貴主先王  
創業啟運功高先世宜為國之太祖有子何以不立梁  
明曰有子羌奴先王之命也業曰昔成王弱齡周召作  
宰漢昭八歲金霍夾輔雖嗣子冲幼而二叔休明左提

右挈不亦可乎梁明曰宋宣能以國讓春秋美之孫伯符委事仲謀終開有吳之業且兄終弟及殷湯之制也亦聖人之格言萬代之通式何必肩已為是紹兄為非業曰美哉使乎之義也利鹿孤聞呂光死遣其將金樹蘇翹率騎五千屯于昌松漠口既逾年赦其境內改元曰建和二千石長吏清高有惠化者皆封亭侯關內侯呂纂來伐使倂檀距之纂士卒精銳進度三堆三軍擾懼倂檀下馬據胡牀而坐士衆心乃始安與纂戰敗之

斬二千餘級纂西擊段業僞檀率騎一萬乘虛襲姑臧  
纂弟緯守南北城以自固僞檀置酒于朱明門上鳴鐘  
鼓以饗將士耀兵于青陽門虜八千餘戶而歸乞伏乾  
歸為姚興所敗率騎數百來奔處之晉興待以上賓之  
禮乾歸遣子謙等質于西平鎮北將軍俱延言于利鹿  
孤曰乾歸本我之屬國妄自尊立理窮歸命非有款誠  
若奔東秦必引師西侵非我利也宜徙於乙弗之間防  
其越逸之路利鹿孤曰吾方弘信義以收天下之心乾

歸投誠而徙之四海將謂我不可以誠信託也俄而乾  
歸果奔於姚興利鹿孤謂延曰不用卿言乾歸果叛卿  
為吾行也延追乾歸至河不及而還利鹿孤立二年龍  
見于長寧麒麟游于綏羌於是羣臣勸進以隆安五年  
僭稱河西王其將鋤勿論進曰昔我先君肇自幽朔被  
髮左衽無冠冕之儀遷徙不常無城邑之制用能中分  
天下威振殊境今建大號誠順天心然寧居樂土非貽  
厥之規倉府粟帛生敵人之志且首兵始號事必無成

陳勝項籍前鑑不遠宜置晉人於諸城勸課農桑以供  
軍國之用我則習戰法以誅未賓若東西有變長算以  
縻之如其敵彊於我從而以避其鋒不亦善乎利鹿孤  
然其言於是率師伐呂隆大敗之獲其右僕射楊桓傳  
檀謂之曰安寢危邦不思擇木老為囚虜豈曰智也桓  
曰受呂氏厚恩位忝端貳雖洪水滔天猶欲濟彼俱溺  
實恥為叛臣以見明主傳檀曰卿忠臣也以為左司馬  
祠部郎中史嵩謂利鹿孤曰古之王者行師以全軍為

上破國次之拯溺救焚東征西怨今不以綏寧為先唯以徙戶為務安土重遷故有離叛所以斬將克城土不加廣今取士拔才必先弓馬文章學藝為無用之條非所以求遠人垂不朽也孔子曰不學禮無以立宜建學校開庠序選耆德碩儒以訓胄子利鹿孤善之於是以田玄冲趙誕為博士祭酒以教胄子時利鹿孤雖僭位尚臣姚興楊桓兄經佐命姚萇早死興聞桓有德望徵之利鹿孤不敢留為之流涕而遣之利鹿孤又遣傳檀



攻呂隆昌松太守孟禕于顯美克之僞檀執禕而數以  
不降之罪禕曰夫能忠於彼者必亦忠於此禕受呂氏  
厚恩受藩屏之任明公至而歸命執事謂何僞檀大說  
釋其縛待以客禮徙顯美麗軒二千餘戶而歸嘉禕忠  
烈拜左司馬禕請曰為人守而不全復忝顯任竊所未  
安如得明公之恩俾就戮于姑臧死且不朽僞檀義而  
許之呂隆為沮渠蒙遜所伐遣使乞師利鹿孤引羣下  
議之尚書左丞婆衍嶠曰二寇相殘適足為吾取之資

不宜救也。僂檀曰：姑臧河西一都之會，不可使蒙遜據之。宜在速救。利鹿孤曰：車騎之言，吾之心也。遂遣僂檀率騎一萬救之。至昌松，而蒙遜已退。僂檀徙涼澤段冢五百餘家而歸。利鹿孤寢疾，令曰：內外多虞，國機務廣，其令車騎嗣業以成先王之志。在位三年而死，葬于西平之東。僞諡曰康王弟僂檀嗣。

僂檀少機警，有才略。其父竒之，謂諸子曰：僂檀明識幹藝，非汝等輩也。是以諸兄不以授子，欲傳之于僂檀。及

利鹿孤即位垂拱而已軍國大事皆以委之以元興元年僭號涼王遷于樂都改元曰弘昌初乞伏乾歸之在晉興也以世子熾磐為質後熾磐逃歸為追騎所執利鹿孤命殺之僞檀曰臣子逃歸君父振古通義故魏武善關羽之奔秦昭恕頃襄之逝熾磐雖逃叛孝心可嘉宜垂全宥以弘海岳之量乃赦之至是熾磐又奔允街僞檀歸其妻子姚興遣使拜僞檀車騎將軍廣武公僞檀大城樂都姚興遣將齊難率衆迎呂隆於姑臧僞檀

攝昌松魏安二戍以避之興涼州刺史王尚遣主簿宗  
敞來聘敞父變吕光時自湟河太守入為尚書郎見僂  
檀于廣武執其手曰君神爽宏拔逸氣凌雲命世之傑  
也必當克清世難恨吾年老不及見耳以敞兄弟託君  
至是僂檀謂敞曰孤以常才謬為尊先君所見稱每自  
恐有累大人水鏡之明及忝家業竊有懷君子詩云中  
心藏之何日忘之不圖今日得見卿也敞曰大王仁侔  
魏祖存念先人雖朱暉眄張堪之孤叔向撫汝齊之子

無以加也酒酣語及平生傳檀曰卿魯子敬之儔恨不

與卿共成大業耳傳檀以姚興之盛又密圖姑臧乃去  
其年號罷尚書丞郎官遣參軍關尚聘于興興謂尚曰  
車騎投誠獻款為國藩屏檀興兵衆輒造大城為臣之  
道固若是乎尚曰王侯設險以自固先王之制也所以  
安人衛衆豫備不虞車騎僻在遐藩密邇勅寇南則逆  
羌未賓西則蒙遜跋扈蓋為國家重門之防不圖陛下  
忽以為嫌興笑曰卿言是也傳檀遣其將文支討南羌

西虜大破之上表姚興求涼州不許加儋檀散騎常侍  
增邑二千戶儋檀于是率師伐沮渠蒙遜次于氐池蒙  
遜嬰城固守芟其禾苗至于赤泉而還獻興馬三千匹  
羊三萬頭興乃署儋檀為使持節都督河右諸軍事車  
騎大將軍領護匈奴中郎將涼州刺史常侍公如故鎮  
姑臧儋檀率步騎三萬次于五澗興涼州刺史王尚遣  
辛曩孟禕彭敏出迎尚出自清陽門鎮南文支入自涼  
風門宗敞以別駕送尚還長安儋檀曰吾得涼州三千

餘家情之所寄唯卿一人奈何捨我去乎敞曰今送舊  
君所以忠于殿下傳檀曰吾今新牧貴州懷遠安邇之  
略為之若何敞曰涼土雖弊形勝之地道由人弘實在  
殿下段懿孟褱武威之宿望辛鼂彭敏秦隴之冠冕裴  
敏馬輔中州之令族張昶涼國之舊胄張穆邊憲文齊  
楊班梁崧趙昌武同飛羽以大王之神略撫之以威信  
農戰並修文教兼設可以從橫於天下河右豈足定乎  
傳檀大悅賜敞馬二十匹於是大饗文武于謙光殿班

賜金馬各有差遣西曹從事史曷聘于姚興興謂曷曰  
車騎坐定涼州衣錦本國其德我乎曷曰車騎積德河  
西少播英問王威未接投誠萬里陛下官方任才量功  
授職彝倫之常何德之有興曰朕不以州授車騎者車  
騎何從得之曷曰使河西雲擾呂氏顛隤者實由車騎  
兄弟傾其根本陛下雖鴻羅遐被涼州猶在天網之外  
故征西以周召之重力屈姑臧齊難以王旅之盛勢挫  
張掖王尚孤城獨守外逼羣狄陛下不連兵十年殫竭



中國涼州未易取也今以虛名假人內收大利乃知妙  
算自天聖與道合雖云遷授蓋亦時宜興悅其言拜騎  
都尉傳檀讌羣寮於宣德堂仰視而歎曰古人言作者  
不居居者不作信矣孟禕曰張文王築城苑繕宮廟為  
貽厥之資萬世之業秦師濟河淮然瓦解梁熙據全州  
之地擁十萬之衆軍敗于酒泉身死于彭濟呂氏以排  
山之勢王有西夏率土崩離銜壁秦雍寬饒有言富貴  
無常忽輒易人此堂之建年垂百載十有二主唯信順

可以久安仁義可以永固願大王勉之倭檀曰非君無以聞讜言也倭檀雖受制于姚興然車服禮章一如王者以宗敞為太府主簿錄記室事倭檀偽游澆河襲徙西平湟河諸羌三萬餘戶于武興番禾武威昌松四郡徵集戎夏之兵五萬餘人大閱于方亭遂伐沮渠蒙遜入西碕蒙遜率衆來距戰於均石為蒙遜所敗倭檀率騎二萬運穀四萬石以給西郡蒙遜攻西郡陷之其後倭檀又與赫連勃勃戰於陽武為勃勃所敗將佐死者

十餘人僇檀與數騎奔南山幾為追騎所得僇檀懼東  
西寇至徙三百里內百姓入于姑臧國中駭怨屠各成  
七兒因百姓之擾也率其屬三百人叛僇檀於北城推  
梁貴為盟主貴閉門不應一夜衆至數千殿中都尉張  
猛大言於衆曰主上陽武之敗蓋恃衆故也責躬悔過  
明君之義諸君何故從此小人作不義之事殿內虎旅  
正爾相尋目前之危悔將無及衆聞之咸散七兒奔晏  
然殿中騎將白路等追斬之軍諮祭酒梁裒輔國司馬

邊憲等七人謀反僞檀悉誅之姚興以僞檀外有陽武  
之敗內有邊梁之亂遣其尚書郎韋宗來觀釁僞檀與  
宗論六國從橫之規三家戰爭之略遠言天命廢興近  
陳人事成敗機變無窮辭致清辯宗出而歎曰命世大  
才經綸名教者不必華宗夏士撥煩理亂澄氛濟世者  
亦未必八索九丘五經之外冠冕之表復自有人車騎  
神機秀發信一代之偉人由余日碑豈足為多也宗還  
長安言于興曰涼州雖殘弊之後風化未頽僞檀權詐

多方憑山河之固未可圖也興曰勃勃以烏合之衆尚  
能破之吾以天下之兵何足克也宗曰形移勢變終始  
殊途陵人者易敗自守者難攻陽武之役僂檀以輕勃  
勃致敗今以大軍臨之必自固求全臣竊料羣臣無僂  
檀匹也雖以天威臨之未見其利興不從乃遣其將姚  
弼及斂成等率步騎三萬來伐又使其將姚顯為弼等  
後繼遺僂檀書云遣尚書左僕射齊難討勃勃懼其西  
逸故令弼等於河西邀之僂檀以為然遂不設備弼衆

至漢口昌松太守蘓霸嬰城固守弼喻霸令降霸曰汝  
違負盟誓伐委順之藩天地有靈將不祐汝吾寧為涼  
鬼何降之有城陷斬霸弼至姑臧屯于西苑州人王鍾  
宋鍾王娥等密為內應候人執其使送之儼檀欲誅其  
元首前軍伊力延侯曰今彊敵在外內有姦豎兵交勢  
踧禍難不輕宜悉坑之以安內外儼檀從之殺五千餘  
人以婦女為軍賞命諸郡縣悉驅牛羊於野斂成縱兵  
虜掠儼檀遣其鎮北俱延鎮軍敬歸等十將率騎分擊

大敗之斬首七千餘級姚弼固壘不出俾檀攻之未克  
乃斷水上流欲以持久斃之會雨甚堰壞弼軍乃振姚  
顯聞弼敗兼道赴之軍勢甚盛遣射將孟欽等五人挑  
戰于涼風門弦未及發材官將軍宋益等馳擊斬之顯  
乃委罪斂成遣使謝俾檀引師而歸俾檀于是僭即涼  
王位赦其境內改年為嘉平置百官立夫人折掘氏為  
王后世子虎臺為太子錄尚書事左長史趙鼂右長史  
郭倖為尚書左右僕射鎮北俱延為太尉鎮軍敬歸為

司隸校尉自餘封署各有差遣其左將軍枯木駙馬都尉胡康伐沮渠蒙遜掠臨松人千餘戶而還蒙遜大怒率騎五千至于顯美方亭破車蓋鮮卑而還俱延又伐蒙遜大敗而歸僞檀將親率衆伐蒙遜趙鼂及太史令景保諫曰今太白未出歲星在西宜以自守難以伐人僞檀怒以為沮衆保復切諫僞檀遂鑠保而行曰有功當殺汝以徇無功封汝百戶侯既而蒙遜率衆來距戰于窮泉僞檀大敗單馬奔還景保為蒙遜所擒讓之曰



卿明于天文為彼國所任違天犯順智安在乎保曰臣  
匪為無智但言而不從蒙遜曰昔漢祖困于平城以婁  
敬為功袁紹敗于官渡而田豐為戮卿策同二子貴主  
未可量也卿必有婁敬之賞者吾今放卿但恐有田豐  
之禍耳保曰寡君雖才非漢祖猶不同本初正可不得  
封侯豈慮禍也蒙遜乃免之至姑臧僞檀謝之曰卿孤  
之著龜也而不能從之孤之深罪封保安亭侯蒙遜進  
圍姑臧百姓懲東苑之戮悉皆驚散疊掘麥田車蓋諸

部盡降於蒙遜。僞檀遣使請和。蒙遜許之。乃遣司隸校尉敬歸及子他為質。歸至胡坑。逃還。他為追兵所執。蒙遜徙其衆八千餘戶而歸。右衛折掘竒鎮據石驢山。以叛。僞檀懼為蒙遜所滅。又慮竒鎮克嶺南。乃遷於樂都。留大司農成公緒守姑臧。僞檀始出城。焦謚王侯等閉門作難。收合三千餘家。保據南城。謚推焦明為大都督。龍驤大將軍。謚為涼州刺史。降于蒙遜。鎮軍敬歸討竒鎮于石驢山。戰敗死之。蒙遜因克姑臧之威。來伐僞檀。

遣其安北段苟左將軍雲連乘虛出番禾以襲其後徙  
三千餘家於西平蒙遜圍樂都三旬不克遣使謂俟  
曰若以寵子為質我當還師俟檀曰去否任卿兵勢卿  
違盟無信何質以供蒙遜怒築室返耕為持久之計羣  
臣固請乃以子安周為質蒙遜引歸吐谷渾樹洛干率  
衆來伐俟檀遣其太子虎臺距之為洛干所敗俟檀又  
將伐蒙遜邯川護軍孟愷諫曰蒙遜初并姑臧兇勢甚  
盛宜固守伺隙不可妄動不從五道俱進至番禾苕藿

掠五千餘戶其將屈右進曰陛下轉戰千里前無完陣  
徙戶資財盈溢衢路宜倍道旋師早度峻險蒙遜善於  
用兵士衆習戰若輕軍卒至出吾慮表大敵外逼徙戶  
內攻危之道也衛尉伊力延曰我軍勢方盛將士勇氣  
自倍彼徙我騎勢不相及若倍道旋師必捐棄資財示  
人以弱非計也屈右出而告其諸弟曰吾言不用天命  
也此吾兄弟死地俄而昏霧風雨蒙遜軍大至偃檀敗  
績而還蒙遜進圍樂都偃檀嬰城固守以子染干為質

蒙遜乃歸久之遣安西紇勃耀兵西境蒙遜侵西平徙  
戶掠牛馬而還邯川護軍孟愷表鎮南湟河太守文支  
荒酒懷諫不卹政事僣檀召文支而讓之文支頓首陳  
謝邯川人衛章等謀殺孟愷南啟乞伏熾磐郭越止之  
密以告愷愷誘章等飲酒殺四十餘人愷懼熾磐軍之  
至馳告文支文支遣將軍匹珍赴之熾磐軍到城聞珍  
將至引歸蒙遜又攻樂都二旬不克而還鎮南文支以  
湟河降蒙遜徙五千餘戶于姑臧蒙遜又来伐僣檀以

太尉俱延為質蒙遜乃引還俾檀議欲西征乙弗孟愷切諫弗聽謂其太子虎臺曰今不種多年內外俱窘事宜西行以拯此弊蒙遜近去不能卒來旦夕所慮唯在熾磐彼名微衆寡易以討禦吾不過一月自足周旋汝謹守樂都無使失墜俾檀乃率騎七千襲乙弗大破之獲牛馬羊四十餘萬熾磐乘虛來襲撫軍從事中郎尉肅言于虎臺曰今外城廣大難以固守宜聚國人於內城肅等率諸晉人距戰于外如或不捷猶有萬全虎臺

曰小賊蕞爾旦夕將走卿何慮之過也虎臺懼晉人有  
二心也乃召豪望有勇謀者閉之于內孟愷泣曰熾磐  
不道人神同情愷等進則荷恩重遷退顧妻子之累豈  
有二乎今事已急矣人思自効有何猜邪虎臺曰吾豈  
不知子忠實懼餘人脫生意表以君等安之耳一旬而  
城潰安西樊尼自西平奔告僞檀僞檀謂衆曰今樂郡  
為熾磐所陷男夫盡殺婦女賞軍雖欲歸還無所赴也  
卿等能與吾籍乙弗之資取契汗以贖妻子者是所望

也不爾歸熾磐便為奴僕矣豈忍見妻子在他懷抱中

遂引師而西衆多逃返遣鎮北段苟追之苟亦不還於是將士皆散唯中軍紇勃後軍洛肱安西樊尼散騎侍郎陰利鹿在焉俛檀曰蒙遜熾磐昔皆委質于吾今而歸之不亦鄙哉四海之廣匹夫無所容其身何其痛也蒙遜與吾名齊年比熾磐姻好少年俱其所忌勢皆不濟與其聚而同死不如分而或全樊尼長兄之子宗部所寄吾衆在北者戶垂一萬蒙遜方招懷遐邇存亡繼



絕汝其西也紇勃洛肱亦與尼俱吾年老矣所適不容  
寧見妻子而死遂歸熾磐唯陰利鹿隨之偁檀謂利鹿  
曰去危就安人之常也吾親屬皆散卿何獨留利鹿曰  
臣老母在家方寸實亂但忠孝之義勢不俱全雖不能  
西哭沮渠申包胥之誠東感秦援展毛遂之操負羈勒  
而侍陛下者臣之分也惟願開弘遠猷審進止之算偁  
檀歎曰知人固未易人亦未易知大臣親戚皆棄我去  
終始不虧者唯卿一人歲寒不凋見之于卿偁檀至西

平熾磐遣使郊迎待以上賓之禮初樂都之潰也諸城  
皆降於熾磐俾檀將尉賢政固守浩疊不下熾磐呼之  
曰樂都已潰卿妻子皆在吾間孤城獨守何所為也賢  
政曰受涼王厚恩為國家藩屏雖知樂都已陷妻子為  
擒先歸獲賞後順受誅然不知主上存亡未敢歸命妻  
子小事豈足動懷昔羅憲待命晉文亮之文聘後來魏  
武不責邀一時之榮忘委付之重竊用恥焉大王亦安  
用之哉熾磐乃遺虎臺手書喻政政曰汝為國儲不能

盡節面縛于人棄父負君虧萬世之業賢政義士豈如  
汝乎既而聞傳檀至左南乃降熾磐以傳檀為驃騎大  
將軍封左南公歲餘為熾磐所鴆左右勸傳檀解藥傳  
檀曰吾病豈宜療邪遂死時年五十一在位十三年偽  
諡景王虎臺後亦為熾磐所殺傳檀少子保周獵於破  
羌俱延子覆龍鹿孤孫副周烏孤孫承鉢皆奔沮渠蒙  
遜久之歸魏魏以保周為張掖王覆龍酒泉公破羌西  
平公副周永平公承鉢昌松公烏孤以安帝隆安元年

僭立至僞檀三世凡十八年以安帝義熙十年滅

南燕

慕容德字玄明皝之少子也母公孫氏夢日入臍中晝寢而生德年未弱冠身長八尺二寸姿貌雄偉額有日角偃月重文博觀羣書性清慎多才藝慕容儁之僭立也封為梁公厯幽州刺史左衛將軍及暉嗣位改封范陽王稍遷魏尹加散騎常侍俄而苻堅將苻雙據陝以叛堅將苻柳起兵枹罕將應之德勸暉乘釁討堅辭旨

慷慨識者言其有遠略曄竟不能用德兄垂甚壯之因  
共論軍國大謀言必切至垂謂之曰汝器識長進非復  
吳下阿蒙也枋頭之役德以征南將軍與垂擊敗晉師  
及垂奔苻堅德坐免職後遇曄敗徙于長安苻堅以為  
張掖太守數歲免歸及堅以兵臨江拜德為奮威將軍  
堅之敗也堅與張夫人相失慕容曄將護致之德正色  
謂曄曰昔楚莊滅陳納巫臣之諫而棄夏姬此不祥之  
人惑亂人主戎事不邇女器秦之敗師當由於此宜掩

目而過奈何將衛之也暉不從德馳馬而去之還次滎陽言于暉曰昔勾踐棲于會稽終獲吳國聖人相時而動百舉百全天將悔禍故使秦師喪敗宜乘其弊以復社稷暉不納乃從垂如鄴及垂稱燕王以德為車騎大將軍復封范陽王居中鎮衛參斷政事久之遷司徒於時慕容永據長子有衆十萬垂議討之羣臣咸以為疑獨德議與垂合遂以滅永垂臨終戒其子寶以鄴城委德寶既嗣位以德為使持節都督冀兗青徐荆豫六州

諸軍事特進車騎大將軍冀州牧領南蠻校尉鎮鄴罷  
留臺以都督專總南夏魏將拓拔章攻鄴德遣南安王  
慕容青等夜擊敗之魏師退次新城青等請擊之別駕  
韓諱進曰古人先決勝廟堂然後攻戰今魏不可擊者  
四燕不宜動者三魏懸軍遠入利在野戰一不可擊也  
深入近畿頓兵死地二不可擊也前鋒既敗後陣方固  
三不可擊也彼衆我寡四不可擊也官軍自戰其地一  
不宜動動而不勝衆心難固二不宜動城隍未修敵來

無備三不宜動此皆兵家所忌不如深溝高壘以逸待勞彼千里餽糧野無所掠久則三軍靡資攻則衆旅多斃師老釁生詳而圖之可以捷矣德曰韓別駕之言良平之策也於是召青還師魏又遣遼西公賀賴盧率騎與章圍鄴德遣其參軍劉藻請救于姚興且參母兄之問而興師不至衆大懼德於是親饗戰士厚加撫接人感其恩皆樂為致命會章盧內相乖爭各引軍潛遁章司馬丁建率衆來降言章師老可以敗之德遣將追破



章軍人心始固時魏師入中山慕容寶出奔於薊慕容  
詳又僭號會劉藻自姚興而至興太史令高魯遣其甥  
王景暉隨藻送玉璽一紐并圖讖祕文曰有德者昌無  
德者亡德受天命柔而復剛又有謠曰大風蓬勃揚塵  
埃八井三刀卒起來四海鼎沸中山頽惟有惡人據三  
臺於是德之羣臣議以慕容詳僭號中山魏師盛于冀  
州未審寶之存亡因勸德即尊號德不從會慕容達自  
龍城奔鄴稱寶猶存羣議乃止尋而寶以德為丞相領

冀州牧承制南夏德兄子麟自義臺奔鄴因說德曰中山既沒魏必乘勝攻鄴雖糧儲素積而城大難固且人情沮動不可以戰及魏軍未至擁衆南渡就魯陽王和據滑臺而聚兵積穀伺隙而動計之上也魏雖拔中山勢不久留不過驅掠而返人不樂徙理自生變然後振威以援之魏則內外受敵使戀舊之士有所依憑廣開恩信招集遺黎可一舉而取之先是慕容和亦勸德南徙於是許之隆安二年乃率戶四萬車二萬七千乘自

鄴將徙於滑臺遇風船沒魏軍垂至衆懼議欲退保黎陽其夕流澌凍合是夜濟師旦魏師至而冰泮若有神焉遂改黎陽津為天橋津及至滑臺景星見于尾箕漳水得白玉狀若璽於是德依燕元故事稱元年大赦境內殊死已下置百官以慕容麟為司空領尚書令慕容法為中軍將軍慕容興拔為尚書左僕射丁通為尚書右僕射自餘封授各有差初河間有麟見慕容麟以為已瑞及此潛謀為亂事覺賜死其夏魏將賀賴盧率衆附

之至是慕容寶自龍城南奔至黎陽遣其中黃門令趙思召慕容鍾來迎鍾本首議勸德稱尊號聞而惡之執思付獄馳使白狀德謂其下曰卿等前以社稷大計勸吾攝政吾亦以嗣帝奔亡人神曠主故權順羣議以繫衆望今天方悔禍嗣帝得還吾將具駕奉迎謝罪行闕然後角巾私第卿等以為何如其黃門侍郎張華進曰夫爭奪之世非雄才不振從橫之時豈懦夫能濟陛下若蹈匹夫之仁捨天授之業威權一去則身首不保何

退讓之有乎德曰吾以古人逆取順守其道未足所以  
中路徘徊悵然未決耳慕輿護請馳問寶虛實德流涕  
而遣之乃率壯士數百隨思而北因謀殺寶初寶遣思  
之後知德攝位懼而北奔護至無所見執思而還德以  
思閑習典故將任之思曰昔關羽見重曹公猶不忘先  
王之恩思雖刑餘賤隸荷國寵靈犬馬有心而況人乎  
乞還就上以明微節德固留之思怒曰周室衰微晉鄭  
夾輔漢有七國之難實賴梁王殿下親則叔父位則上

台不能率先羣后以匡王室而幸根本之傾為趙倫之事思雖無申胥哭秦之效猶慕君賓不生莽世德怒斬之晉南陽太守閭丘羨寧朔將軍鄧啟方率衆二萬來伐師次管城德遣其中軍慕容法撫軍慕容和等距之王師敗績德怒法不窮追晉師斬其撫軍司馬靳瓌初苻登既為姚興所滅登弟廣率部落降於德拜冠軍將軍處之乞活堡會熒惑守東井或言秦當復興者廣乃自稱秦王敗德將慕容鍾時德始都滑臺介于晉魏之

間地無十城衆不過數萬及鍾喪師反側之徒多歸於  
廣德乃留慕容和守滑臺親率衆討廣斬之初寶之至  
黎陽也和長史李辯勸和納之和不從辯懼謀洩乃引  
晉軍至管城冀德親率師於後作亂會德不出愈不自  
安及德此行也辯又勸和反和不從辯怒殺和以滑臺  
降於魏時將士家悉在城內德將攻之韓範言於德曰  
魏師已入城據國成資客主之勢翻然復異人情既危  
不可以戰宜先據一方為關中之基然後畜力而圖之

計之上也德乃止德右衛將軍慕容雲斬李辯率將士  
家累二萬餘人而出三軍慶悅德謀於衆曰苻廣雖平  
而撫軍失據進有彊敵退無所託計將安出張華進曰  
彭城阻帶山川楚之舊都地嶮人殷可攻而據之以為  
基本慕容鍾慕輿護封逞韓諱等固勸攻滑臺潘聰曰  
滑臺四通八達非帝王之居且北通大魏西接彊秦此  
二國者未可以高枕而待之彭城土曠人稀地平無嶮  
晉之舊鎮必距王師又密邇江淮水路通浚秋夏霖潦



十里為湖且水戰國之所短吳之所長今雖克之非久  
安之計也青齊沃壤號曰東秦土方二千戶餘十萬四  
塞之固負海之饒可謂用武之國三齊英傑蓄志以待  
孰不思得明主以立尺寸之功廣固者曹嶷之所營山  
川阻峻足為帝王之都宜遣辯士馳說於前大兵繼進  
於後辟閭渾昔負國恩必翻然向化如其守迷不順大  
軍臨之自然瓦解既據之後閉關養銳伺隙而動此亦  
二漢之有關中河內也德猶豫未決沙門朗公素知占

侯德因訪其所適朗曰敬覽三策潘尚書之議可謂興  
邦之術矣今歲初長星起于奎婁遂埽虛危而虛危齊  
之分野除舊布新之象宜先定舊魯巡撫琅邪待秋風  
戒節然後北轉臨齊天之道也德大悅引師而南兗州  
北鄙諸縣悉降置守宰以撫之存問高年軍無私掠百  
姓安之牛酒屬路德遣使喻齊郡太守辟閭渾渾不從  
遣慕容鍾率步騎二萬擊之德進據琅邪徐兗之士附  
者十餘萬自琅邪而北迎者四萬餘人德進寇莒城守

將任安委城而遁以潘聰鎮莒城鍾傳檄青州諸郡開  
曉禍福令有能斬送渾者賞同佐命渾聞德軍將至徙  
八千餘家入廣固諸郡皆承檄降于德渾懼將妻子奔  
於魏德遣射聲校尉劉綱追斬于莒城渾參軍張瑛嘗  
與渾作檄辭多不遜及此德擒而讓之瑛神色自若徐  
對曰渾之有臣猶韓信之有蒯通通遇漢祖而蒙恕臣  
遭陛下而嬰戮比之古人竊為不幸防風之誅臣實甘  
之但恐堯舜之化未弘於四海耳德初善其言後竟殺

之德遂入廣固四年僭即皇帝位於南郊大赦改元為建平設行廟於宮南遣使奉策告成焉進慕容鍾為司徒慕容拔為司空封孚為左僕射慕容輿護為右僕射遣其度支尚書封愷中書侍郎封逞觀省風俗所在大饗將士以其妻段氏為皇后建立學官簡公卿已下子弟及二品士門二百人為太學生後因讌其羣臣酒酣笑而言曰朕雖寡薄恭己南面而朝諸侯在上不驕夕惕於位可方自古何等主也其青州刺史鞠仲曰陛下中

興之聖后少康光武之儔也德顧命左右賜仲帛千匹  
仲以賜多為讓德曰卿知調朕朕不知調卿乎卿飾對  
非實故亦以虛言相賞賞不謬如何足謝也韓範進曰  
臣聞天子無戲言忠臣無妄對今日之論上下相欺可  
謂君臣俱失德大悅賜範絹五十匹自是昌言競進朝  
多直士矣德母兄先在長安遣平原人杜弘如長安問  
存否弘曰臣至長安若不奉太后動止便即西如張掖  
以死為効臣父雄年踰六十未沾榮貴乞本縣之祿以

申烏烏之情張華進曰杜弘未行而求祿要利情深不可使也德曰吾方散所輕之財招所重之死況為親尊而可吝乎且弘為君迎親為父求祿雖外如要利而實忠孝乃以雄為平原令弘至張掖為盜所殺德聞而悲之厚撫其妻子明年德如齊城登營丘望晏嬰冢顧謂左右曰禮大夫不逼城葬平仲古之賢人達禮者也而生居近市死葬近城豈有意乎青州秀才晏謨對曰孔子稱臣先人平仲賢則賢矣豈不知高其梁豐其禮蓋

政在家門故儉以矯世存居湫隘卒豈擇地而葬乎所以不遠門者猶冀悟平生意也遂以謨從至漢城陽景王廟讌庶老于申池北登社首山東望鼎足因目牛山而歎曰古無不死愴然有終焉之志遂問謨以齊之山川丘陵賢哲舊事謨歷對詳辯畫地成圖德深嘉之拜尚書郎立治於商山置鹽官於烏常澤以廣軍國之用德故吏趙融自長安來始具母兄凶問德號慟吐血因而寢疾其司隸校尉慕容達因此謀反遣牙門皇璆率

衆攻端門殿中師侯赤眉開門應之中黃門孫進扶德  
踰城隱於進舍段宏等聞宮中有變勒兵屯四門德入  
宮誅赤眉等達懼而奔魏慕容法及魏師戰於濟北之  
標榆谷魏師敗績其尚書韓諱上疏言百姓因秦晉之  
弊迭相蔭冒或百室合戶或千戶共籍公避課役擅為  
姦宄宜隱實黎萌正其編貫庶益軍國兵資之用德納  
之遣其車騎將軍慕容鎮率騎三千緣邊嚴防備百姓  
逃竄以諱為使持節散騎常侍行臺尚書巡郡縣隱實



得蔭戶五萬八千諱公廉正直所在野次人不擾焉德  
大集諸生親臨策試既而饗宴乘高遠矚顧謂其尚書  
魯邃曰齊魯固多君子當昔全盛之時梓慎巴生淳于  
鄒田之徒蔭修檐臨清沼馳朱輪佩長劍恣非馬之雄  
辭奮談天之逸辯指麾則紅紫成章俛仰則丘陵生韻  
至於今日荒草頽墳氣消煙滅永言千載能不依然邃  
答曰武王封比干之墓漢祖祭信陵之墳皆留心賢哲  
每懷往事陛下慈深二主澤被九泉若使彼而有知寧

不銜荷矣先是妖賊王始聚衆於泰山自稱太平皇帝號其父為太上皇兄為征東將軍弟征西將軍慕容鎮討擒之斬於都市臨刑或問其父及兄弟所在始答曰太上皇帝蒙塵於外征東征西亂兵所害惟朕一身獨無聊賴其妻怒之曰止坐此口以至於此奈何復爾始曰皇后自古豈有不破之家不亡之國邪行刑者以刀鐶築之仰視曰崩即崩矣終不改帝號德聞而哂之時桓玄將行篡逆誅不附已者冀州刺史劉軌襄城太守

司馬休之征虜將軍劉敬宣廣陵相高雅之江都長張  
誕並內不自安皆奔於德於是德中書侍郎韓範上疏  
請乘晉亂奄有吳會德下令王公詳議茲事其下咸以  
桓玄新得志未可圖乃止於是講武於城西步兵三十  
七萬車一萬七千乘鐵騎五萬三千周亘山澤旌旗彌  
漫鉦鼓之聲振動天地德登高望之顧謂劉軌高雅之  
曰昔卻克忿齊子胥怨楚終能暢其剛烈名流千載卿  
等既知投身有道當使無慙昔人也雅之等頓首答曰

幸蒙陛下天覆之恩大造之澤存亡繼絕實在聖時雖則萬隕何以上報俄聞桓玄敗德以慕容鎮為前鋒慕容鍾為大都督配以步卒二萬騎五千尅期將發而德寢疾於是罷兵初德迎其兄子超於長安及是而至德夜夢其父曰汝既無子何不早立超為太子不爾惡人生心寤而告其妻曰先帝神明所勅觀此夢意吾將死矣乃下書以超為皇太子大赦境內子為父後者人爵二級其月死即義熙元年也時年七十乃夜為十餘棺

分出四門潛葬山谷竟不知其尸之所在在位五年偽  
諡獻武皇帝

超字祖明德兄北海王納之子苻堅破鄴以納為廣武  
太守數歲去官家於張掖德之南征留金刀而去及垂  
起兵山東苻昌收納及德諸子皆誅之納母公孫氏以  
耄獲免納妻段氏方娠未決囚之於郡獄獄掾呼延平  
德之故吏也嘗有死罪德免之至是將公孫及段氏逃  
於羌中而生超焉年十歲而公孫氏卒臨終授超以金

刀曰若天下太平汝得東歸可以此刀還汝叔也平又將超母子奔于莒光及呂隆降于姚興超又隨涼州人徙于長安超母謂超曰吾母子全濟呼延氏之力平今雖死吾欲為汝納其女以答厚意於是娶之超自以諸父在東恐為姚氏所錄乃陽狂行乞秦人賤之惟姚紹見而異焉勸興拘以爵位召見與語超深自晦匿興大鄙之謂紹曰諺云妍皮不裹癡骨妄語耳由是得去來無禁德遣使迎之超不告母妻乃歸及至廣固呈以金

刀具宣祖母臨終之言德撫之號慟超身長八尺腰帶

九圍精彩秀發容止可觀德甚加禮遇始名之曰超封

北海王拜侍中驃騎大將軍司隸校尉開府置佐吏德

無子欲以超為嗣故為超起第於萬春門內朝夕觀之

超亦深達德旨入則盡歡承奉出則傾身下士於是內

外稱美焉頃之立為太子及德死以義熙元年僭嗣偽

位大赦境內改元曰太上尊德妻段氏為皇太后以

慕容鍾都督中外諸軍錄尚書事慕容法為征南都督

徐充揚南充四州諸軍事慕容鎮加開府儀同三司尚書  
令封孚為太尉麴仲為司空潘聰為左光祿大夫封嵩  
為尚書左僕射自餘封拜各有差後又以鍾為青州牧  
段宏為徐州刺史公孫五樓為武衛將軍領屯騎校尉  
內參政事封孚言於超曰臣聞五大不在邊五細不在  
庭鍾國之宗臣社稷所賴宏外戚懿望親賢具瞻正應  
參翼百揆不宜遠鎮方外今鍾等出藩五樓內輔臣竊  
未安超新即位害鍾等權逼以問五樓五樓欲專斷朝



政不欲鍾等在內屢有間言孚說竟不行鍾宏俱有不平之色相謂曰黃犬之皮恐當終補狐裘也五樓聞之嫌隙漸構初超自長安行至梁父慕容法時為兗州鎮南長史悅壽還謂法曰向見北海王子天資弘雅神爽高邁始知天族多奇玉林皆寶法曰昔成方遂詐稱衛太子人莫辯之此復天族乎超聞而恚恨形於言色法亦怒處之外館由是結憾及德死法又不奔喪超遣使讓焉法常懼禍至因此遂與慕容鍾段宏等謀反超知

而徵之鍾稱疾不赴於是收其黨侍中慕容統右衛慕容根散騎常侍段封誅之車裂僕射封嵩於東門之外西中郎將封融奔於魏超尋遣慕容鎮等攻青州慕容昱等攻徐州慕容凝韓範攻梁父昱等攻莒城拔之徐州刺史段宏奔於魏封融又集羣盜襲石塞城殺鎮西大將軍餘鬱青土震恐人懷異議慕容凝謀殺韓範將襲廣固範知而攻之凝奔梁父範并其衆攻梁父克之凝奔姚興慕容法出奔於魏慕容鎮克青州鍾殺其妻

子為地道而出單馬奔姚興於時超不恤政事畋游是好百姓苦之其僕射韓諱切諫不納超議復肉刑九等之選羣下議多不同乃止超母妻既先在長安為姚興所拘責超稱藩求太樂諸伎若不可使送吳口千人超下書遣羣臣詳議左僕射段暉議曰太上因楚高祖不迴今陛下嗣守社稷不宜以私親之故而降統天之尊又太樂諸伎皆是前世伶人不可與彼使移風易俗宜掠吳口與之尚書張華曰若侵掠吳邊必成鄰怨此既

能往彼亦能來兵連禍結非國之福也昔孫權重黎庶之命屈已以臣魏惠施惜愛子之頭捨志以尊齊況陛下慈德在秦方寸崩亂宜暫降大號以申至孝之情權變之道典謨所許韓範智能迴物辯足傾人昔與姚興俱為秦太子中舍人可遣將命降號修和所謂屈於一人之下申於萬人之上也超大悅曰張尚書得吾心矣使範聘於興及至長安興謂範曰封愷前來燕王與朕抗禮及卿至也欸然而附為依春秋以小事大之義為

當專以孝敬為母屈也。範曰：昔周爵五等，公侯異品，小大之禮因而生焉。今陛下命世龍興，光宅西秦，本朝主上承祖宗遺烈，定鼎東齊，中分天曜，南面並帝，通聘結好，義尚謙沖，便至矜誕，苟折行人，殊似吳晉爭盟。滕薛競長，恐傷大秦堂堂之盛；有損皇燕巍巍之美。彼我俱失，竊未安之。興怒曰：若如卿言，便是非為大小而來。範曰：雖由大小之義，亦緣寡君純孝過於重華，願陛下體敬親之道，霽然垂愍。興曰：吾久不見賈生，自謂過之。今

不及矣於是為範設舊交之禮申叙平生謂範曰燕王  
在此朕亦見之風表乃可於機辯未也範曰大辯若訥  
聖人美之況爾日龍潛鳳戢和光同塵若使負日月而  
行則無繼天之業矣興笑曰可謂使乎延譽者也範承  
間逞說姚興大悅賜範千金許以超母妻還之慕容凝  
自梁父奔於姚興言於興曰燕王稱藩本非推德權為  
母屈耳古之帝王尚興師徵質豈可虛還其母乎母若  
一還必不復臣也宜先制其送伎然後歸之興意乃變

遣使聘於超超遣其僕射張華給事中宗正元入長安  
送太樂伎一百二十人於姚興興大悅延華入讌酒酣  
樂作興黃門侍郎尹雅謂華曰昔殷之將亡樂師歸周  
今皇秦道盛燕樂來庭廢興之兆見於此矣華曰自古  
帝王為道不同權譎之理會於功成故老子曰將欲取  
之必先與之今總章西入必由余東歸禍福之驗此其  
兆乎興怒曰昔齊楚競辯二國連師卿小國之臣何敢  
抗衡朝士華遜辭曰奉使之始實願交歡上國上國既

遺小國之臣辱及寡君社稷臣亦何心而不仰酬興善之於是還超母妻義熙三年追尊其父為穆皇帝立其母段氏為皇太后妻呼延氏為皇后祀南郊將登壇有獸大如馬狀類鼠而色赤集於圜丘之側俄而不知所往在須臾大風暴起天地晝昏其行宮羽儀皆振裂超懼密問其太史令成公綏對曰陛下信用姦臣誅戮賢良賦斂繁多事役殷苦所致也超懼而大赦譴責公孫五樓等俄而復之是歲廣固地震天齊水湧井水溢汝水



竭河濟凍合而澠水不冰超正旦朝羣臣於東陽殿聞

樂作歎音侑不備悔送伎於姚興遂議入寇其領軍韓

諲諫曰先帝以舊京傾沒戢翼三齊苟時運未可上智

輟謀今陛下嗣守成規宜閉關養士以待賊釁不可結

怨南隣廣樹仇隙超曰我計已定不與卿言於是遣其

將斛穀提公孫歸等率騎寇宿豫陷之執陽平太守劉

千載濟陰太守徐阮大掠而去簡男女二千五百付大

樂教之時公孫五樓為侍中尚書領左衛將軍專總朝

政兄歸為冠軍常山公叔父頽為武衛興樂公五樓宗親皆夾輔左右王公內外無不憚之超論宿豫之功封斛穀提等並為郡縣公慕容鎮諫曰臣聞懸賞待勲非功不侯今公孫歸結禍延兵殘賊百姓陛下封之得無不可乎夫忠言逆耳非親不發臣雖庸朽忝國戚藩輒盡愚款惟陛下圖之超怒不答自是百僚杜口莫敢開言尚書都令史王儼諂事五樓遷尚書郎出為濟南太守入為尚書左丞時人為之語曰欲得侯事五樓又遣

公孫歸等率騎五千入寇濟南執太守趙元略男女千餘人而去劉裕率師將討之超引見羣臣於東陽殿議距王師公孫五樓曰吳兵輕果所利在戰初鋒勇銳不可爭也宜據大峴使不得入曠日延時沮其銳氣可徐簡精騎二千循海而南絕其糧運別勅段暉率兗州之軍緣山東下腹背擊之上策也各命守宰依險自固校其資儲之外餘悉焚蕩芟除粟苗使敵無所資堅壁清野以待其釁中策也縱賊入峴出城逆戰下策也超曰

京都殷盛戶口衆多非可一時入守青苗布野非可卒  
芟設使芟苗城守以全性命朕所不能今據五州之彊  
帶山河之固戰車萬乘鐵馬萬羣縱令過峴至於平地  
徐以精騎踐之此成擒也賀賴盧苦諫不從退謂五樓  
曰上不用吾計亡無日矣慕容鎮曰若如聖旨必須平  
原用馬為便宜出峴逆戰戰而不勝猶可退守不宜縱  
敵入峴自貽窘逼昔成安君不守井陘之關終屈於韓  
信諸葛瞻不據東馬之嶮卒擒于鄧艾臣以為天時不

如地利阻守大峴策之上也超不從鎮出謂韓諱曰主上既不能芟苗守嶮又不肯從人逃寇酷似劉璋矣今年國滅吾必死之卿等中華之士復為文身矣超聞而大怒收鎮下獄乃攝苕梁父二戍修城隍簡士馬畜銳以待之其夏王師次東莞超遣其左軍段暉輔國賀賴盧等六將步騎五萬進據臨朐俄而王師度峴超懼率卒四萬就暉等於臨朐謂公孫五樓曰宜進據川源晉軍至而失水亦不能戰矣五樓馳騎據之劉裕前驅將

軍孟龍符已至川源五樓戰敗而返裕遣諮議參軍檀  
韶率銳卒攻破臨朐超大懼單騎奔段暉於城南暉衆  
又戰敗裕軍人斬暉超又奔還廣固徙郭內人入保小  
城使其尚書郎張綱乞師於姚興赦慕容鎮進錄尚書  
都督中外諸軍事引見羣臣謝之曰朕嗣奉成業不能  
委賢任善而專固自由覆水不收悔將何及智士逞謀  
必在事危忠臣立節亦在臨難諸君其勉思六奇共濟  
艱運鎮進曰百姓之心係於一人陛下既躬率六軍身

先奔敗羣臣解心士庶喪氣內外之情不可復恃如聞  
西秦自有內難恐不暇分兵救人正當更決一戰以爭  
天命今散卒還者猶有數萬可悉出金帛宮女餽令一  
戰天若相我足以破賊如其不濟死尚為美不可閉門  
坐受圍擊司徒慕容惠曰不然今晉軍乘勝有陵人之  
氣敗軍之將何以禦之秦雖與勃勃相持不足為患且  
二國連衡勢成唇齒今有寇難秦必救我但自古乞援  
不遣大臣則不致重兵是以趙隸三請楚師不出平原

一使援至從成尚書令韓範德望具瞻燕秦所重宜遣  
乞援以濟時艱於是遣範與王薄乞師於姚興未幾裕  
師圍城四面皆合人有竊告裕軍曰若得張綱為攻具  
者城乃可得耳是月綱自長安歸遂奔於裕裕令綱周  
城大呼曰勃勃大破秦軍無兵相救超怒伏弩射之乃  
退右僕射張華中丞封愷並為裕軍所獲裕令華愷與  
超書勸令早降超乃遺裕書請為藩臣以大峴為界并  
獻馬千匹以通和好裕弗許江南繼兵相尋而至尚書



張俊自長安還又降於裕說裕曰今燕人所以固守者  
外仗韓範冀得秦援範既時望又與姚興舊昵若勃勃  
敗後秦必救燕宜密信誘範啗以重利範來則燕人絕  
望自然降矣裕從之表範為散騎常侍遺範書以招之  
時姚興乃遣其將姚强率步騎一萬隨範就其將姚紹  
於洛陽并兵來援會赫連勃勃大破秦軍興追强還長  
安範歎曰天其滅燕乎會得裕書遂降於裕裕謂範曰  
卿欲立申包胥之功何以虛還也範曰自亡祖司空世

荷燕寵故泣血秦庭冀匡禍難屬西朝多故丹誠無效  
可謂天喪弊邑而贊明公智者見幾而作敢不至乎翌  
日裕將範循城由是人情離駭無復固志裕謂範曰卿  
宜至城下告以禍福範曰雖蒙殊寵猶未忍謀燕裕嘉  
而不彊左右勸超誅範家以止後叛超知敗在旦夕又  
弟諄盡忠無貳故不罪焉是歲東萊雨血廣固城門鬼  
夜哭明年朔旦超登天門朝羣臣于城上殺馬以饗將  
士文武皆有遷授超幸姬魏夫人從超登城見王師之

盛握超手而相對泣韓諄諫曰陛下遭百六之會正是  
勉彊之秋而反對女子悲泣何其鄙也超拭目謝之其  
尚書令董銳勸超出降超大怒繫之於獄於是賀賴盧  
公孫五樓為地道出戰王師不利河間人玄文說裕曰  
昔趙攻曹疑望氣者以為澠水帶城非可攻拔若塞五  
龍口城必自陷石虎從之而疑請降後慕容恪之圍段  
龕亦如之而龕降降後無幾又震開之今舊基猶在可  
塞之裕從其言至是城中男女患脚弱病者大半超輦

而升城尚書悅壽言於超曰天地不仁助寇為虐戰士  
疴病日就凋隕守困窮城息望外援天時人事亦可知  
矣苟歷運有終堯舜降位轉禍為福聖達以先宜追許  
鄭之蹤以存宗廟之重超歎曰廢興命也吾寧奮劒決  
死不能銜壁求生於是張網為裕造衝車覆以版屋蒙  
之以皮并設諸奇巧城上火石弓矢無所施用又為飛  
樓懸梯木幔之屬遙臨城上超大怒懸其母而支解之  
城中出降者相繼裕四面進攻殺傷甚衆悅壽遂開門

以納王師超與左右數十騎出亡為裕軍所執裕數之以不降之狀超神色自若一無所言惟以母託裕將劉敬宣而已裕送建康市斬之時年三十六在位六年始德以安帝隆安四年僭立至超二世凡十一年以義熙六年滅

慕容鍾字道明德從弟也少有識量喜怒不形於色機神秀發言論清辯至於臨難對敵智勇兼濟累進奇策德用之頗中由是政無大小皆以委之遂為佐命元勳

後公孫五樓規挾威權慮鍾抑已因勸超誅之鍾遂謀反事敗奔於姚興興拜始平太守歸義侯

封孚字處道渤海蓇人也祖悛振威將軍父放慕容暉之世吏部尚書孚幼而聰敏和裕有士君子之稱寶僭位累遷吏部尚書及蘭汗之篡南奔辟閭渾渾表為渤海太守德至莒城孚出降德曰朕平青州不以為慶喜於得卿也常外總機事內參密謀雖位任崇重謙虛博納甚有大臣之體及超嗣位政出權嬖多違舊章軌憲

日頽殘虐滋甚孚屢盡匡救超不能納也後臨軒謂孚  
曰朕於百王可方誰孚對曰桀紂之主超大慙怒孚徐  
步而出不為改容司空鞠仲失色謂孚曰與天子言何  
其亢厲宜應還謝孚曰行年七十墓木已拱惟求死所  
耳竟不謝以超三年死於家時年七十一文筆多傳於  
世

北涼

沮渠蒙遜臨松盧水胡人也其先世為匈奴左沮渠遂

以官為氏焉蒙遜博涉羣史頗曉天文雄傑有英略滑稽善權變梁熙呂光皆奇而憚之故常游飲自晦會伯父羅仇麴粥從呂光征河南光前軍大敗麴粥言於兄羅仇曰主上荒耄驕縱諸子朋黨相傾讒人側目今軍敗將死正是智勇見猜之日可不懼乎吾兄弟素為所憚與其經死溝瀆豈若勒衆向西平出荅藿奮臂大呼涼州不足定也羅仇曰理如汝言但吾家累世忠孝為一方所歸寧人負我無我負人俄而皆為光所殺宗姻



諸部會葬者萬餘人蒙遜哭謂衆曰昔漢祚中微吾之  
乃祖翼獎寶融保寧河右呂王昏耄荒虐無道豈可不  
上繼先祖安時之志使二父有恨黃泉衆咸稱萬歲遂  
斬光中田護軍馬邃臨松令井祥以盟一旬之間衆至  
萬餘屯據金山與從兄男成推光建康太守段業為使  
持節大都督龍驤大將軍涼州牧建康公改呂光龍飛  
二年為神璽元年業以蒙遜為張掖太守男成為護國  
將軍委以軍國之任業將使蒙遜攻西郡衆咸疑之蒙

遜曰此郡據嶺之要不可不取業曰卿言是也遂遣之  
蒙遜引水灌城城潰執太守呂純以歸於是王德以晉  
昌孟敏以敦煌降業業封蒙遜臨池侯呂弘去張掖將  
東走業議欲擊之蒙遜諫曰歸師勿遏窮寇弗追此兵  
家之戒也不如縱之以為後圖業曰一日縱敵悔將無  
及遂率衆追之為弘所敗業賴蒙遜而免歎曰孤不能  
用子房之言以至於此業築西安城以其將臧莫孩為  
太守蒙遜曰莫孩勇而無謀知進忘退所謂為之築

家非築城也業不從俄而為呂纂所敗蒙遜懼業不能容  
已每匿智以避之業僭稱涼王以蒙遜為尚書左丞梁中  
庸為右丞呂光遣其二子紹纂代業業請救於禿髮  
烏孤烏孤遣其弟鹿孤及楊軌救業紹以業等軍盛欲  
從三門關挾山而東纂曰挾山示弱取敗之道不如結  
陣衝之彼必憚我而不戰也紹乃引軍而南業將擊之  
蒙遜諫曰楊軌恃虜騎之強有窺覲之志紹纂兵在死  
地必決戰求生不戰則有泰山之安戰則有累卵之危

業曰卿言是也乃按兵不戰紹亦難之各引兵歸業憚  
蒙遜雄武微欲遠之乃以蒙遜從叔益生為酒泉太守  
蒙遜為臨池太守業門下侍郎馬權雋爽有逸氣武略  
過人業以權代蒙遜為張掖太守甚見稱重每輕陵蒙  
遜蒙遜亦憚而怨之乃譖之於業曰天下不足慮惟當  
憂馬權耳業遂殺之蒙遜謂男成曰段業愚闇非濟亂  
之才信讒愛佞無鑒斷之明所憚惟索嗣馬權今皆死  
矣蒙遜欲除業以奉兄何如男成曰業羈旅孤飄我所

建立有吾兄弟猶魚之有水人既親我背之不祥乃止  
蒙遜既為業所憚內不自安請為西安太守業亦以蒙  
遜有大志懼為朝夕之變乃許焉蒙遜期與男成同祭  
蘭門山密遣司馬許咸告業曰男成欲謀叛許以取假  
日作逆若求祭蘭門山臣言驗矣至期日果然業收男  
成令自殺男成曰蒙遜欲謀叛先已告臣臣以兄弟之  
故隱忍不言以臣今在恐部人不從與臣尅期祭山返  
相誣告臣若朝死蒙遜必夕發乞詐言臣死說臣罪惡

蒙遜必作逆臣投袂討之事無不捷業不從蒙遜聞男  
成死泣告衆曰男成忠於段公枉見屠害諸君能為報  
仇乎且州土兵亂似非業所能濟吾所以初奉之者以  
之為陳吳耳而信讒多忌枉害忠良豈可安枕卧觀使  
百姓離於塗炭男成素有恩信衆皆憤泣而從之比至  
氐池衆逾一萬鎮軍臧莫孩率部衆附之羌胡多起兵  
響應蒙遜壁於侯塢業先疑其右將軍田昂幽之於內  
至是謝而赦之使與武衛梁中庸等攻蒙遜業將王豐

孫言於業曰西平諸田世有反者昂貌恭而心狠志大  
而情險不可信也業曰吾疑之久矣但非昂無可以討  
遜豐孫言既不從昂至侯塢率騎五百歸於蒙遜蒙遜  
至張掖昂兄子承愛斬關內之業左右皆散蒙遜大呼  
曰鎮西何在軍人曰在此業曰孤單飄一已為貴門所  
推可見勾餘命投身嶺南庶得東還與妻子相見蒙遜  
遂斬之業京兆人也博涉史傳有尺牘之才為杜進記  
室從征塞表儒素長者無他權略威禁不行羣下擅命

尤信卜筮識記巫覡徵祥故為姦佞所誤隆安五年梁  
中庸房晷田昂等推蒙遜為使持節大都督大將軍涼  
州牧張掖公赦其境內改元永安署從兄伏奴為鎮軍  
將軍張掖太守和平侯弟擘為建忠將軍都谷侯田昂  
為鎮南將軍西郡太守臧莫孩為輔國將軍房晷梁中  
庸為左右長史張隲謝正禮為左右司馬擢任賢才文  
武咸悅時姚興遣將姚碩德攻呂隆於姑臧蒙遜遣從  
事中郎李典聘于興以通和好蒙遜以呂隆既降於興



酒泉涼寧二郡叛降李暉乃遣建忠拏牧府長史張潛  
見碩德於姑臧請軍迎接率郡人東遷碩德大悅拜潛  
張掖太守拏建康太守潛勸蒙遜東遷拏私於蒙遜曰  
呂氏猶存姑臧未拔碩德糧竭將還不能久也何故違  
離桑梓受制於人輔國莫孩曰建忠之言是也蒙遜乃  
斬張潛因下書蠲省百徭專功南畝明設科條務盡地  
利時梁中庸為西郡太守西奔李暉蒙遜聞之笑曰吾  
與中庸義深一體而不信我但自負耳孤豈恨之乃盡歸

其妻孥蒙遜下令求言令內外羣僚各搜揚賢雋廣  
進芻蕘以聞遣輔國臧莫孩襲山北虜大破之姚興遣  
將齊難率衆四萬迎呂隆隆勸難伐蒙遜難從之莫孩  
敗其前軍難乃結盟而還蒙遜伯父中田護軍親信臨  
松太守孔鷲並驕奢侵害百姓苦之蒙遜曰亂吾國者  
二伯父也何以綱紀百姓乎皆令自殺蒙遜襲狄洛磐  
於番禾不尅遷其五百餘戶而還姚興遣使人梁斐張  
構等拜蒙遜鎮西大將軍沙州刺史西海侯時興亦拜

禿髮儁檀為車騎將軍封廣武公蒙遜聞之不悅謂斐  
等曰儁檀上公之位而身為侯者何也構對曰儁檀輕  
狡不仁款誠未著聖朝所以加其重爵者褒其歸善即  
叙之義耳將軍忠貫白日勲高一時當入諧鼎味匡贊  
帝室安可以不信待也聖朝爵必稱功官不越德如尹  
緯姚晃佐命初基齊難徐洛元勲驍將並位纔二品爵  
止侯伯將軍何以先之乎竇融殷勤固讓不欲居舊臣  
之右未解將軍忽有此問蒙遜曰朝廷何不即以張掖

見封乃更遠封西海邪構曰張掖規畫之內將軍已自有之所以遠授西海者蓋欲廣大將軍之國耳蒙遜大悅乃受拜時地震山崩折木太史令劉梁言於蒙遜曰辛酉金也地動於金金動刻木大軍東行無前之徵時張掖城每有光色蒙遜曰王氣將成百戰百勝之象也遂攻禿髮西郡太守楊統於日勒統降拜為右長史寵踰功舊張掖太守句呼勒出奔西涼以從弟成都為金山太守羅仇子也鄯為西郡太守麴粥子也句呼勒自

西涼奔還待之如初蒙遜率騎二萬東征次於丹嶺北  
虜大人思盤率部落三千降之時木連理生於永安蒙  
遜率步騎三萬伐禿髮儁檀次於西郡大風從西北來  
氣有五色俄而晝昏至顯美徙數千戶而還儁檀追及  
蒙遜於窮泉蒙遜將擊之諸將皆曰賊已安營弗可犯  
也蒙遜曰儁檀謂吾遠來疲弊必輕而無備及其壘壁  
未成可以一鼓而滅進擊敗之乘勝至於姑臧夷夏降  
者萬數千戶儁檀懼請和許之而歸及儁檀南奔樂都

魏安人焦朗據姑臧自立蒙遜率步騎三萬攻朗尅而  
宥之饗文武將士於謙光殿班賜金馬有差以敦煌張  
穆博通經史才藻清贍擢拜中書侍郎委以機密之任  
以其弟拏為護羌校尉秦州刺史封安平侯鎮姑臧旬  
餘而拏死又以從祖益子為鎮京將軍護羌校尉秦州  
刺史鎮姑臧俄而蒙遜遷於姑臧以義熙八年僭即河  
西王位大赦境內改元立始置官僚如呂光為三河王  
故事繕宮殿起城門諸觀立其子政德為世子加鎮衛

大將軍錄尚書事傳檀來伐蒙遜敗之於若厚塢傳檀

湟河太守文支據湟州護軍成宜侯率衆降之署文支

鎮東大將軍廣武太守振武侯成宜侯為振威將軍湟

川太守以殿中將軍王建為湟河太守蒙遜西如苕薩

遣冠軍伏恩率騎一萬襲卑和烏啼二虜大破之俘二

千餘落而還蒙遜寢於新臺閭人王懷祖擊蒙遜傷足

其妻孟氏擒斬之夷其三族蒙遜母車氏疾篤蒙遜升

南景門散錢以賜百姓下書大赦殊死已下俄而車氏

死蒙遜遣其將運糧於湟河自率衆攻尅乞伏熾磐廣武郡以運糧不繼自廣武如湟河度浩疊熾磐遣將乞伏黠尼寅距蒙遜蒙遜擊斬之熾磐又遣將王衡折斐麴景弇率騎一萬據勒姐嶺蒙遜且戰且前大破之擒折斐等七百餘人麴景奔還蒙遜以弟漢平為折衝將軍湟河太守乃引還晉益州刺史朱齡石遣使來聘蒙遜遣舍人黃迅報聘益州因表朝廷願率河西戎卒為晉右翼前驅以圖尅復熾磐率衆三萬襲湟河漢平力



戰固守遣司馬隗仁夜出擊熾磐斬級數百熾磐將引退先遣老弱漢平長史焦昶將軍段景密信招熾磐熾磐復進攻漢平漢平納昶景之說面縛出降仁勒壯士百餘據南門樓上三日不下衆寡不敵為熾磐所擒熾磐怒命斬之段暉諫曰仁臨難履危奮不顧命忠也宜宥之以厲事君熾磐乃執之而歸在熾磐所五年暉又為之固請乃得還姑臧及至蒙遜執其手曰卿孤之蘇武也以為高昌太守為政有威惠之稱然頗以愛財為

失蒙遜西祀金山遣沮渠廣宗率騎一萬襲烏啼虜大  
捷而還蒙遜西至苕藿遣前將軍沮渠成都將騎五千  
襲卑和虜蒙遜率中軍三萬繼之卑和虜率衆迎降遂  
循海而西至鹽池祀西王母寺寺中有玄石神圖命其  
中書侍郎張穆賦焉銘之於寺前遂如金山而歸蒙遜  
下書曰頃自春炎旱害及時苗碧原青野倏為枯壤將  
刑政失中下有冤獄乎役繁賦重上天所譴乎內省多  
缺孤之罪也書不云乎百姓有過罪予一人可大赦殊

死已下翌日而澍雨大降蒙遜聞劉裕滅姚泓怒甚門下校郎劉祥言事於蒙遜蒙遜曰汝聞劉裕入關敢研研然也遂殺之其峻暴如是顧謂左右曰古之行師不犯歲鎮所在姚氏舜後軒轅之苗裔也今鎮星在軒轅而裕滅之亦不能久守關中蒙遜為李歆敗於解支澗復收散卒欲戰前將軍成都諫曰臣聞高祖有彭城之敗終成大業宜旋師以為後圖蒙遜從之城建康而歸其羣下上書言朝士多違憲制不遵典章或公文御案

而在家卧署或事無可否望空而過至今黜陟無紀駁議不聞宜肅振綱維申修舊則蒙遜納之命征南姚弋尚書左丞房晷撰朝堂制行之旬日百僚振肅太史令張衍言於蒙遜曰今歲臨澤城西當有破兵蒙遜乃遣其世子德政屯兵若厚塢蒙遜西至白岸謂張衍曰吾今年當有所定但太歲在申月又建申未可西行且當南巡要其歸會主而勿客以順天心計在臨機慎勿露也遂攻浩疊而虵盤於帳前蒙遜笑曰前一為騰虵今

盤在吾帳天意欲吾迴師先定酒泉燒攻具而還次於  
川巖聞李歆徵兵欲攻張掖蒙遜曰入吾計矣但恐聞  
吾迴軍不敢前也兵事尚權乃露布西境稱得浩疊將  
進軍黃谷歆聞而大悅進入都瀆澗蒙遜潛軍逆之敗  
歆於壞城遂進克酒泉百姓安堵如故軍無私焉以子  
牧捷為酒泉太守歆之舊臣皆隨才擢叙蒙遜既克酒  
泉於是西域諸國皆詣蒙遜朝貢稱臣蒙遜僭立九年  
而宋氏受禪蒙遜前既稱藩於晉宋景平初遂受宋命

為都督涼秦河沙四州諸軍事驃騎大將軍涼州牧河西王是歲遣其世子政德擊柔然兵敗見殺遂立次子興國為世子元嘉五年改年承元明年遣世子興國攻秦為秦王慕末所禽復立興國母弟菩提為世子蒙遜嘗遣使求書於宋文帝並給之又就司徒王弘求搜神記弘亦與之八年復遣其尚書郎宗舒左常侍高猛稱臣朝貢於魏繼遣其子安周內侍八年魏太武遣兼太常李順持節拜蒙遜為假節加侍中都督涼州西域羌

戎諸軍事太傅行征西大將軍涼州牧涼王王七郡置  
將相羣卿百官建天子旌旗出入警蹕如漢初諸侯王  
故事使司徒崔浩為冊書以褒賞之蒙遜復改年為義  
和元嘉十年夏四月蒙遜死時年六十六蒙遜在位三  
十三年偽諡武宣王廟號太祖

牧捷亦曰茂虔蒙遜諸子也蒙遜滅西涼使鎮酒泉後  
徙敦煌太守牧捷聰穎好學和雅有度量蒙遜病甚國  
人議以世子菩提幼弱廢之立牧捷為世子加中外大

都督大將軍錄尚書事至是遂襲偽位改年永和遣使告命於魏先是魏太武遣李順迎蒙遜女為夫人會蒙遜使牧捷受蒙遜遺意送妹於代太武拜為昭儀復遣李順拜牧捷為使持節侍中都督涼沙河三州西域羌戎諸軍事車騎將軍開府儀同三司領護西戎校尉涼州刺史河西王牧捷上表乞安平一號太武不許元嘉十一年牧捷復奉表於宋宋亦冊命為涼州刺史河西王牧捷尚魏太武妹武威公主遣其相宋繇表謝獻馬



五百匹黃金百斤繇又表請公主及牧捷母妃后定號  
太武命其臣議之皆曰母以子貴妻從夫爵牧捷母宜  
稱河西國太后公主於其國稱王后於京師則稱公主  
太武從之牧捷遣建節將軍沮渠旁周朝魏太武遣侍  
中古弼尚書李順賜牧捷侍臣衣服有差并徵其世子  
封壇入侍牧捷遣封壇朝於平城先是牧捷淫於其嫂  
李氏兄弟三人傳嬖之李與牧捷姊共毒公主太武遣  
醫乘傳救公主得愈太武徵李氏牧捷不遣厚送居於

酒泉十六年魏使者自西域還至武威牧捷左右有告使者曰我君承蠕蠕可汗妄言云去歲魏天子自來伐我士馬疲死大敗而還我君大喜宣言於國使者還以聞太武遣尚書賀多羅使涼州觀虛實賀多羅還亦言牧捷雖外修臣禮內實乖悖是歲夏六月太武親討牧捷命公卿為書數其十二罪且曰若親帥羣臣迎拜馬首上策也六軍既臨面縛輿櫬其次也若守迷不悟身死族滅為世大戮宜思厥中自求多福七月太武至上

郡屬國城以安遠將軍源賀為鄉導牧捷聞魏師濟河  
用其左丞姚定國計不肯出迎求救於蠕蠕遣其弟征  
南大將軍董來將萬餘人出戰望風奔潰太武至姑臧  
遣使諭牧捷出降牧捷聞蠕蠕欲入魏邊冀幸太武東  
還遂嬰城固守太武分軍圍之源賀引兵招慰諸部鮮  
卑下三萬餘落故太武得專攻姑臧無復外慮既而牧  
捷兄子祖踰城出降太武具知城中情實因急攻之牧  
捷兄子萬年復率麾下來降九月姑臧城潰牧捷率其

文武五千人面縛請降太武釋而禮之收其城內戶口

二十餘萬使張掖王禿髮保周及龍驤將軍穆羆與源  
賀分徇諸部雜胡降者又數十萬擊取張掖樂都酒泉  
武威皆置將守之徙牧捷宗族及吏民三萬戶於平城  
初牧捷即位之三年有老父投書於敦煌東門求之不  
獲書曰涼王三十年若七年牧捷以問奉常張慎慎對  
曰昔號之將亡神降於華願陛下崇德修政以享三十  
年之祚若盤於遊田荒於酒色臣恐七年將有大變牧

捷不悅又有人於震電所得石丹書曰河西河西三十

年破帶石樂七年帶石青山名在姑臧南舊有神祀傍  
泥陷不通董來曰祀豈有道乎遂毀祀伐木通道而行  
至是果七年而滅始蒙遜以晉安帝隆安五年僭立至  
牧捷二世三十九年而滅太武克姑臧猶以妹壻待牧  
捷其母死以王太妃禮葬焉又為蒙遜置守冢三十家  
牧捷至平城太武授征西大將軍河西王如故當姑臧  
之未破也牧捷使人斫開庫取金銀珠玉及珍奇器物

不更封閉百姓因之入盜巨細蕩盡有司求賊不得元  
嘉二十四年其所親人及守藏者告之乃窮竟其事搜  
其家中悉得所藏器物又告牧捷父子多畜毒藥前後  
隱竊殺人乃有百數姊妹皆為左道朋行淫佚曾無媿  
顏又蒙遜在時有罽賓沙門曇無讖者東入鄯善自云  
能使鬼神療病令婦人多子與鄯善王妹曇頭陀林淫  
通發覺亡奔涼州蒙遜寵之號曰聖人曇無讖以男女  
交接術教授婦女蒙遜諸女子婦皆往受法太武聞諸

行人言曇無讖術乃召之蒙遜不遣乃發露其事拷訊

殺之至是告者亦言太武追記其事遂賜昭儀沮渠氏

死誅其宗族唯萬年及祖以前降得免是歲又有人告

牧犍與故臣交通謀反太武詔司徒崔浩就公主第賜

牧犍死牧犍與主決良久乃自裁太武葬以王禮謚曰

哀及公主死詔與牧犍合葬公主無男有女以國甥得

襲母爵為武威公主蒙遜子季義為魏東雍州刺史後

與河東薛安都謀逆召至平城使其兄弟扼殺之萬年

以先降故封張掖王祖廣武公後亦坐謀逆賜死牧捷  
弟樂安太守安周當牧捷之敗奔於吐谷渾太武遣鎮  
南將軍奚眷討之牧捷弟酒泉太守無諱奔晉昌太武  
使弋陽公元絜守酒泉無諱圍酒泉陷之又圍張掖不  
能克退保臨松太武以詔諭之時永昌王健鎮涼州無  
諱使其中尉詣健求奉酒泉及送絜還朝太武於是拜  
無諱征西大將軍涼州牧酒泉王尋以無諱謀規叛亂  
復遣奚眷討酒泉克之無諱遂謀渡流沙遣安周西擊




鄯善鄯善欲降會魏使者勸令拒守安周不能克退保  
東城既而鄯善王比龍西奔且末其世子乃從安周鄯  
善大亂無諱遂渡流沙士卒渴死者大半因據鄯善先  
是高昌太守闕爽為敦煌公李寶舅唐契所攻聞無諱  
至鄯善使人詐降欲令無諱與唐契相擊留安周住鄯  
善從焉者東北趣高昌會蠕蠕殺唐契爽遂拒無諱無  
諱將衛興奴逐屠其城爽奔蠕蠕無諱復據高昌元嘉  
二十一年夏無諱病死安周立後為蠕蠕所并沮渠氏

遂絕



通志卷一百九十二



總校官庶吉士臣侍朝

校對官編修臣楊壽楠

謄錄監生臣莫漢